



# e-bilten

OPĆINA TEŠANJ

www.opcina-tesanj.ba

e-mail: fuad.sisic@opcina-tesanj.ba

Ponedjeljak  
Broj 67

04.06.2012

1. Tešanj je drugačiji
2. Formula za uspjeh
3. Srebrenico, Srebrenico
4. SDP-SDA

Ukoliko želite da se prijavite za primanje ovog biltena možete to učiniti tako što ćete poslati e-mail na sljedeću adresu: fuad.sisic@opcina-tesanj.ba. Molimo vas da ovaj elektronski bilten prosljedite svim zainteresiranim u našoj općini. Ukoliko želite da objavite neke od vaših novosti, iskoristite elektronski bilten općinskog načelnika, koji je brz, efikasan i besplatan način komuniciranja sa javnošću.

Sa zadovoljstvom očekujem vaše komentare, sugestije i primjedbe.

Molim da ne prinate ovaj sadržaj. Za svaki nepotrebno odštampan papir mora se bez potrebe oboriti drvo koje raste!



## Tešanj je drugačiji

Gosti odaju priznanja

Četvrtak, 10. maja 2012. godine u posjeti Općini Tešanj je boravila Elvira Begović, direktorica nezavisne novinske agencije "ONASA" sa saradnicima. Prvi puta su došli u Tešanj. Prvi utisci veoma pozitivni. Prilikom kratkog uvodnog razgovora, g-đa Begović nije krila svoje pozitivne utiske, a između ostalog je kazala: "Prilikom dolaska pred zgradu Općine, vozač je stao na cesti dok smo mi izašli iz auta. Dok smo iznijeli opremu sve je to trajalo par minuta a već je kolona automobila bila iza našeg auta. Ali ne mogu vjerovati da niko nije stisnuo na sirenu, nije bilo nikakvih znakova nervoze. U Sarajevu ne možeš stati tako ni nekoliko sekundi a da ne čujete sirenu iza vas."

Isti dan popodne, novinari Al-Jazeera za Balkan, prvi puta u Tešnju. Kazali su: "Veoma je ugodno. Definitvno - vi ste ovdje drugačiji!"

Ja sam i jednima, i drugima u prikladnom trenutku odgovorio: "Hvala vam! I mi mislimo da je lokalni ambijent pozitivan, da je Tešanj nešto drugačija sredina, ali volimo to kada nam drugi kažu."

## Formula za uspjeh

Uz osmijeh spominjem Tešanj

Tešanj nema niti jednog studenta koji nije pokriven stipendijom. Tešanj je čist grad. U njemu se djeca u osnovnim školama takmiče u prikupljanju plastičnih boca, a za novac koji dobiju od Omorike - firme za reciklažu i od Općine, za trud, opremili su sportske dvorane, kabinete za informatiku, obnovili rasvjetu.

Tešanj ima i formulu koja bi mogla biti primjenjiva i u drugim lokalnim zajednicama. Ali Tešanj, prije svega, ima čovjeka koji se, umjesto da krivi drugog za svoju situaciju, pouzdao u plodove znoja vlastitog.

Izvor: <http://balkans.aljazeera.net/blog-yayini/uz-osmijeh-spominjem-tesanj>

Teško je precizno odrediti koliko u svemu ima iskustva rata, koliko odbijanja da duh ne oboli i ne doživi kraj kakav je opisan u rečenici koju je napisao Amir Brka a proslavio Sidran ("Kažu, tako rat ubija one što misle da su ga preživjeli").

Izvor: Dani, broj.267, 26.07.2002.



## Srebrenico, Srebrenico

Mrvu Pravde I zrno Istine Pronađite

Deset godina nakon genocida u Srebrenici, Evropski palament je donio Rezoluciju o Srebrenici u kojoj priznaju da je Srebrenica bila zaštićena zona UN-a, da je preko 8.000 muslimanskih muškaraca i djece koji su tražili zaštitu pobijeno, da je preko 25.000 žena, staraca i djece deportovano, kao i silovanje velikog broja žena, priznaju da su to uradile snage bosanskih Srba i paravojne jedinice kao i neredovne jedinice iz Srbije, priznaju višestruko kršenje Ženevske konvencije koji su počinili vojnici bosanskih Srba i odaje počast svim žrtvama okrutnosti tokom rata u bivšoj Jugoslaviji i potvrđuju 11. juli kao dan Evropskog parlamenta sjećanja na srebrenički genocid.

Tešanj je u periodu od 24. juna 1993. do 19. marta 1994. godine bio pod punom opsadom. Srećom nije bio pod zaštitom UN-a, jer da jeste, danas bi možda u gornjoj rezoluciji pisalo pored srebreničkog i tešanjki genocid. Hvala Bogu pa tako nije, nego je ovako. Ali kada je ovako kako jeste, kada je Srebrenici bilo suđeno da doživi genocid a Tešnju da preživi, onda bismo mi u Tešnju trebali pokazati više razumijevanja nego drugi za preživjele genocida u Srebrenici. Skupština RS BiH nije prihvatila rezoluciju Evropskog parlamenta, Skupština Republike Srbije jeste. Jedva, za nekoliko glasova iznad 50% ali jeste - smogli su snage da se suoče sa istinom i priznaju istinu. Ma kako bolna bila.

Vlast u RS BiH nije. Vlast u RS BH se bori kako bi se lokalni izbori u Srebrenici održali kao i u svakoj drugoj općini u Bosni i Hercegovini. Naravno, ne treba ništa drugo ni očekivati od vlasti koja nije u stanju priznati istinu o onome što se dogodilo. Oni žele to izbrisati, zaboraviti bilo iz krajnje okrutnosti ili krajnjeg stida. Ali se izbrisati - ne može, zaboraviti - ne može.


Vlast BiH nema snage da to riješi jer u vlasti BiH su i oni koji ne priznaju istinu. Vlast u Srebrenici je nemoćna. Grijeh je prozivati lokalnu vlast u Srebrenici i one koji su preživjeli genocid da sami mogu nešto više. Njihova snaga je pobijena, a njihovo dostojanstvo pogaženo. Ovo jeste pitanje svih Bošnjaka i svih istinoljubivih ljudi u Bosni i Hercegovini, a tek onda izvan nje. Jer oni koji su gledali kako se vrši genocid ne mogu dalje od proglašenja rezolucija. Mislim na one koji donose odluke, ne mislim na narode i građane koji bi sigurno digli svoj glas i digli svoju ruku da su znali i kada bi znali istinu.

Zato Srebrenica nije samo pitanje lokalnih izbora, nije pitanje ko će biti načelnik u Srebrenici, nije pitanje samo onih koji su živjeli ili preživjeli u Srebrenici, niti onih koji su protjerani iz Srebrenice - ovo je pitanje ljudskog dostojanstva, a nakon toga bošnjačkog. Stoga pozivam svakog čovjeka koji drži do istine, pravde i ljudi a poseban poziv upućujem svakom Bošnjaku da dadne doprinos.

U Tešnju ima udruženje "Klub prijatelja Srebrenice", ako ne znate kako pomoći onda se obratite ovom udruženju. Ono će pomoći vama da vi pomognete Srebrenici.

***Nego, Barem na tren jedan, Pogledajte gdje vam se, U dušama, Po knjigama, Zagubilo zrno, Istine i Pravde.***

***Ako u svom srcu, Barem jedno, Od Pravde i Istine, Zrno pronađete, Od dobra i srebra, Srebrenu i dobru, Ljepoticu, Srebrenicu - Srebrenici vratite!*** (A. Sidran)



Mrvu Pravde  
I zrno Istine  
Pronađite!

Općina Tešanj

Tešanj, BiH; Telefon: +387 32 650 547, +387 32 650 220; Faks: +387 32 650 547  
www.opcina-tesanj.ba, e-mail: optesanj@bih.net.ba



## SDP-SDA

Haineken koalicija



Ne znam ko je u pravu, i u ovoj situaciji to i nije primarno važno, koliko je važno kako se SDP i SDA odnose prema razlikama. Prvo, priče javnosti o razlikama ove dvije stranke, o sistemu vrijednosti, o ljevici, centru i desnici su se svele na banalnosti u političkom smislu, na to ko više a ko manje pije ili ne pije, ko više a ko manje vjeruje ili ne vjeruje. Lideri ove dvije političke stranke su dugo vremena govorili kako je država ispred stranačkih interesa i razlika, i to je bilo dovoljno da se ne otvara pitanje koalicije ove dvije stranke na nivou unutarstranačkih organa na nižim nivoima. Ponadali smo se da lutanje po terenu s lijeve na desnu stranu i obrnuto, u slučaju Bosne i Hercegovine, jeste samo taktički manevar u borbi za glasove a ne strateški cilj. Ponadali smo se da je konačno strateški cilj svih onih koji su za Bosnu i Hercegovinu očuvanje države i jačanje uloge institucija na svim nivoima vlasti u Bosni i Hercegovini. Onda se zapelo sa formiranjem vlasti na nivou Vijeća ministara, SDP neće hdz-ove, SNSD neće bez hdz-ova, SDA ostaje uz leđa SDP-u. Ali nakon 15 izgubljenih mjeseci, dešava se zaokret. SDP ne samo da neće sa hdz-ovima nego to hoće ali bez SDA. Budžet!? Trogodišnji fiskalni okvir? Sulejman Tihić kaže da ga nisu konsultovali, da nisu konsultovali SDA i da je ponuđeni prijedlog loš. I počinje medijski obračun između SDP i SDA?!

Gdje su izgubljeni stavovi da je država Bosna i Hercegovina ispred stranačkih razlika? Odgovore smo čuli.

**Tihić:** Nećemo glasati za ovakav budžet. Nama je važnija država od ministarskih fotelja. Ne mogu nas izbaciti iz vlasti jer ko će onda brinuti o Državi?

**Lagumdžija:** Budžet je sasvim dovoljan za funkcionisanje institucija države Bosne i Hercegovine. Ko ne glasa za budžet on ne podržava stabilizaciju odnosa i put BiH prema euroatlantskim integracijama. Ako SDA ne glasa za budžet, ne može realizovati budžet onaj ko ne glasa za njega!

Ovakvo ponašanje lidera je zaista na veoma niskom nivou odgovornosti. Lideri koji nemaju snage da razgovaraju o ovako ozbiljnim i strateški važnim pitanjima, unutar probosanskih stranaka, iza zatvorenih vrata ne znam šta očekuju od javnosti? Zar ne znaju da građani očekuju dogovore i odgovore, a ne međusobna prozivanja. Ljudi ne znaju mnogo o budžetu i fiskalnom okviru, ali znaju da je neprihvatljivo međusobno javno optuživanja bilo koga ko se bori za Bosnu i Hercegovinu. To je više od sramote.

Jasno je da i razlike mogu biti takve da se o njima neće iz nekih razloga moći usaglasiti. Ali to apsolutno nije opravdanje za ovakvo medijsko istupanje. Postoje procedure odlučivanja i proceduralno djelovanje. Dogodilo se u Predsjedništvu BiH, pa u zastupničkom domu Parlamenta BiH pa u Domu naroda od strane zastupnika iz reda SDA ulaganje amandmana koji nisu prihvaćeni. To je legitimna proceduralna i politička borba, i prijedlozi nisu dobili podršku. SDP je prihvatio amandmane SNSD-a ali ne i SDA.





Tek nakon toga, tek kada se institucionalna procedura okončala, lideri političkih stranaka su mogli i imali povod otvoriti pitanje "vladajuće šestorke", ili kako neki vole kazati da je to stvar "bošnjačkog dvojca" iz Federacije. Prije toga nije bilo nijednog razloga za javne istupe, to ne samo da nije partnerski odnos, to nije nikakav međusobni odnos.

Kao što je na sjednici Doma naroda Parlamenta BiH od 29.05.2012. godine dopredsjedavajući Doma naroda BiH Sulejman Tihić podsjetio je na razloge zbog kojih će delegati iz Stranke demokratske akcije (SDA) glasati protiv predloženog budžeta: "Smatramo da on šteti BiH i ne zadovoljava potrebe države BiH. Fiskalni okvir je napravljen bez predstavnika SDA, preglasani smo u Vijeću ministara, Predsjedništvu BiH, Predstavničkom domu i bit ćemo preglasani i ovdje u Domu naroda. Problem je u uskom fiskalnom okviru koji je BiH stavio u nepovoljan položaj u odnosu na entitete, a što ugrožava funkcioniranje države kao i njen put ka EU i NATO-u", to je bilo sasvim dovoljno.

Delegat Mehmed Bradarić pojasnio je da niko nije zadovoljan predloženim bužetom, ali da on mora biti usvojen da bi bilo izbjegnuto stanje anarhije. "Bez budžeta nema općinskih izbora, popisa stanovništva, poticajnih sredstava EU, MMF-a...", kazao je Bradarić.

A nakon institucionalno okončane procedure imali su razloga i SDA, i SDP. SDA je imala razlog da otvori pitanje koalicije ili saradnje sa SDP-om jer zastupnici SDP-a nisu podržali amandmane partnerskog kluba u vlasti, a SDP je imao razloge jer je SDA uložila amandmane mimo prethodno usaglašenih stavova o tim amandmanima. Ozbiljni ljudi to na fer i korektan način rade i kada je riječ o mnogo manje važnim stvarima. Ali takav pristup nije napravljen.

Ali nakon što je budžet usvojen bez glasova SDA, SDP pokreće mehanizam koji je očigledno bio u cjelosti ranije dogovoren. Kako je lider opozicija Fahrudin Radončić pri gostovanju u dnevniku TV FACE početkom maja rekao: *Ja redovno sjedim sa g-dinom Lagumdžijom, razgovaramo i usaglašavamo stavove.* Na što mu je Senad Hadžifejzović odgovorio pitanjem: *Je li normalno da se lider pozicije i lider opozicije dogovaraju, dok se SDP i SDA kao partneri u vlasti ne dogovaraju?!* Nije normalno, i nije ni prva ni posljednja stvar koja nije normalna ali se događa. Ali tu nije kraj. SDP sada ide na destabiizaciju kantonalnih vlada u četiri katona gdje može formirati većinu bez SDA. Pokrenuta je smjena ministara SDA takvom brzinom kao da se radi o ratnom stanju. **Zlatko Lagumdžija** je prije manje od dvije godine **Fahrudina Radončića**, javno, u jednoj od najgledanijih emisija **nazvao reketašom i mafijašom**. Također, ni Radončić nije bježao od toga da Lagumdžiji spočita aferu *Reket*.

Danas, 02.06.2012. godine prolazim ispred zgrade pošte u Tešnju a službenik PTTa izađe i zamoli me da preuzmem preporučenu - hitnu poštu upućenu načelniku općine i predsjedavajućem vijeća.



Dvije koverta preporučene pošte za 23. sjednicu Skupštine ZDK.

U potpisu Predsjedavajući Skupštine ZDK: Sretko Radišić. U petak, 01.06.2012. godine su se sastali Sretko Radišić i Igor Matanović i sa **dva glasa** „za“ izabrali Radišića za predsjedavajućeg Skupštine umjesto dosadašnjeg Miralema Galijaševića. Sretko je baš srećko. Dnevni red za ponedjeljak, 04.06.2012. godine u 11,00 sati: šest tačaka, svaka tačka je smjena po jednog ministra iz SDA. Efikasnost na zavidnom nivou, troškovi još na većem, odgovornost prema javnosti i građanima na najnižem. Premijer Vlade ZDK je nebrojeno puta kazao da SDA-SDP saradnja u interesu države nema alternativu. Sada je pokrenuo smjenu ministara iz SDA jer je Lagumdžija našao alternativu.

Ali se mora prihvatiti jedno i ići dalje: **i to je demokratija.**



Općinski načelnik  
Fuad Šišić

